



partii naleraq

Nuuk, 25. marts 2015

Hans Enoksen

UPA2015/35

**Inuit Pisinnaatitaaffii pillugit Sullissivimmik pilersitsinissaq sulissutigeqqullugu aamma Naligiimmik pineqarnissaq pillugu Ataatsimiititaliamik pilersitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Inuit Pisinnaatitaaffii pillugit Sullissiviup Inuit Pisinnaatitaaffiit Kalaallit Nunaata Siunnersuisooqatigiiviniq allatsitut sullissineq tigussavaa taamatullu Naligiimmik pineqarnissaq pillugu Ataatsimiititaliaq allatseqarfittut sullisissallugu.**

(Inatsisartunut Ilaasortaq Aaja Chemnitz Larsen, Inuit Ataqtigiit)

### **Siullermeerneqarnera**

Inatsisartunut Ilaasortaq Aaja Chemnitz Larsen, Inuit ataqtigiit, Inuit pisinnaatitaaffii pillugit sullissivimmik pilersitsinissaq aammalu naligiimmik pineqarnissaq pillugu ataatsimiititaliamik Naalakkersuisut pilersitseqqullugit aalajangiiffigisassatut siunnersuutaa, tamanna Partii Naleqqamiit saqqummiussivigissavarput.

Siunnersuuteqartup tunngavilersuutigisai soqtiginarput aammalu eqqarsaatigilluagassaallutik tassami siunnersuuteqartup saqqummiussaa sorpassuartigut inuttut pisinnaatitaaffigut pillugit qaammarsaanissamut sullissinissamullu pitsanngorsaaniarnermik siunertaqarmata.

Nunatsinni pisinnaatitaaffitta sukumisumik ilisimaneqarnissaat annertuumik qaammarsaatigisariaqarpoq. Tassami malunnaarlunnartarpoq ilaatigut inatsisinik tunngavissanik ilisimannilluaraanni sullinneqarnerliornikkut eqqunngitsumillu aalajangiinerit naammagittaalliutigineqarsinnaasut amerlasuut unitsiinnarneqartarmata.

Inuimmi sullinneqarnermikkut eqqunngitsumik pineqartartut pisortaqarfinni, kommunini, allarpassuarnilu sullinneqarnerminni eqqunngitsumik pineqartutut misigisimagaluarlutik qanoq ingerlariaqqissinnaanerminnut ilisimasatik killeqarnerat pissutigalugu unitsiinnartarnerat ilaatigut naammattuugassaasarmat.

Inatsisartut inatsisaat nr. 23, 3. december 2012-imeersoq Inuit Pisinnaatitaaffiit Kalaallit Nunaata Siunnersuisooqatigiivi pillugit Inatsisartut inatsisaat issuaavigilaassavara.

Tassani § 2-mi immikkoortoq 5-imi allaqqammat:

*“ Inuit pisinnaatitaaffiit ilinniartitsineq tapersorsorlugu siuarsarlugulu.”*

Taavalu aamma immikkoortoq 6-imi allaqqasoqarpoq:

*“Inuit pisinnaatitaaffii pillugit paasissutissiissutinik ingerlatitseqqittarnermut peqataassallutik.”*

Inuit pisinnaatitaaffiinik qaammarsaaneq nunatsinni annertusarlunnartariaqarpoq, tassami inatsimmik tunngaveqaraluarluta ilaatigut qaammarsaaneq malunnarnerpaajunngitsoq nassuerutigisariaqarparput.

Naak nunatsinni oqartoqartaraluartoq pisinnaatitaaffigut annertuumik illersugaallutik ingerlatsisoqartoq, inunnut amerlasuunut taamaangitsoq Partii Naleqqamiit oqaatigisariaqarparput, inuppassuit nunatsinni pisinnaatitaaffiigaasutut misigisimasut amerlasuujusut nangaangivilluta Partii Naleqqamiit ilumoornerassagatsigu.

Inuttut pisinnaatitaaffitsigut malunnarluartumik assigiinngisitsisoqartartoq ilungersunartutut tigullugu qaammarsaanerup annertusarneqarnissaa Naalakkersuinikkut sulissutigisariaqalerparput, amerlaqaammi ilaatigut inuit pisinnaatitaaffii pillugit ataqqineqaratik qaangiataaginnarneqartartut.

Oqaatsit pillugit assigiinngisitsinerit nunatsinni annertoqaat, kalaallisuinnaq oqaasillit periarfissaqartinneqaratik ilinniarnissamut imaaluunniit suliffittaarnissaminnut kingulliussaajuartarput, tamannalu soorunami pissusissamisuunngilluinnarpoq.

Taavalu aamma qanoq ukioqarneq pillugu pisinnaatitaaffiiaasoqarsinnaanngilaq, taamaakkaluartoq kingullermik aalisarnermut akuersissutit Naalakkersuisunik aqqinneqarmata 30-t ataallugit ukiullit periarfissinneqarput taavalu utoqqaanerusut mattullugit aammalu 30-t ataallugit ukiullit aalisartut allat periarfissinnagit tassa pisinnaatitaaffiiaaneq ingasalluinnarpoq.

Inoqatitta ataqqinnartumik pisinnaatitaaffimmillu piiiiaffigineqaratik nunatsinni inoqataanissaat qulakkeerlugu aqqissuutassaraarput, taamaattumik siunnersuuteqartup Aaja Chemnitz Larsen-ip siunnersuummini tunngavilersuutai Partii Naleqqamiit tamakkiisumik isumaqatigaagut.

Assersuutigalugu inuppassuit nunatsinniit Danmark-imut nussornikuupput ilaatigut inuttut pisinnaatitaaffitik maani atorsinnaannginnamikkitt. Innaarluutillit napparsimasut inissaaleqinerit suliffissaaleqineq aningaasallu tunniuttakkat annikippaallarnerat ilaatigut pissutigalugit.

Inuit Pisinnaatitaaffii pillugit naammagittaalliuteqarniaraanni saaffissaq Namminersorlutik Oqartussat ataanni Naalakkersuisoqarfimmi inissisimanagera tulluarpallaanngilaq, tassami attuumassuteqanngitsumik naammagittaalliorfissaqaraanni toqqissisimanarnerussammat inunnut suliaakkiissuteqartunut.

Nalunngilarput eqqartussiviit kiisalu Ombudsmand-i aqcutigineqarsinnaasut, tamannalumi aamma ajunngilluinnarpoq, kisianni tassa pitsaanerpaassagaluarpoq Inuit Pisinnaatitaaffii pillugit sullissivimmik attuumassuteqanngitsumik pilersitsinissarput akuersaassallugu.

Nunatsinni Inuit Pisinnaatitaaffiinik assigiinngisitsinermik ingerlatsinerit amerlasuut inunnik amerlasuunik misigineqartartut ikinnerulissappata, sullissinerillu pitsaanerulissappata taava

pinngitsoorneqarsinnaanngilaq Inuit Pisinnaatitaaffii pillugit sullissivik ullumikkornit  
ersarinnerujussuarmik innuttaasut akornanni qaammarsaasariaqartoq Partii Naleqqamiit  
piumasaralugu kissaatigissavarput.

Siunnersuullu tamakkiisumik akuersissutigineqassasoq Partii Naleqqamiit Inatsisartunut  
kaammattuutigissagatsigu.